

## M023: Frau Ava: Jüngstes Gericht (V)

0,1 nû sol ich rede rechen .  
0,2 vile vorhtelîchen .  
0,3 von dem jungesten tage .  
0,4 als ich vernomen habe .  
0,5 unde von der êwigen korône .  
0,6 die got gibet ze lône .  
0,7 sweliche wole gestriten .  
0,8 an dem jungesten zîte .  
0,9 vinvzehen zeichen geschehent .  
0,10 sô die wîsesten jehent .  
0,11 wir ne vernâmen nie niht mêre .  
0,12 von sô bitterme sêre .  
0,13 sô bibenet allez daz dâr ist .  
0,14 sô nâhet uns der heilige Krist .  
0,15 an dem êrsten tage . alsô ich vernomen habe .  
0,16 sô hebet sich diu klage .  
0,17 sô wirdet daz zeichen dâ ze stunt .  
0,18 diu wazzer smiegent sich an den grunt .  
0,19 vierzic klâfter iz in gêt .  
0,20 einen tac iz alsô gestêt .  
0,21 an dem anderen tage .  
0,22 daz sulen wir iu sagen .  
0,23 sô gêt iz aber wider ûz .  
0,24 vile hôhe leinet iz sich wider ûf .  
0,25 sô beginnet iz bellen .  
0,26 mit michelen wellen .  
0,27 daz iz alle die hoerent .  
0,28 die den sin dare kêrent .  
0,29 über elliu diu rîche .  
0,30 sô stêt iz vorhtelîchen .  
0,31 an dem dritten tage .  
0,32 alse ich vernomen habe .  
0,33 sô wider vliuzet ob der erde .  
0,34 daz wazzer al ze berge .  
0,35 widergêt im der strâm .  
0,36 daz sihet wîp unde man .  
0,37 sô trûret allez daz dâr ist .  
0,38 wande daz urteile nâhen ist .

0,39 an dem vierden tage .  
0,40 sô hebet sich diu klage .  
0,41 sô hebet sich von grunde .  
0,42 vische unde allez merwunder .  
0,43 ob dem mere si vehtent  
0,44 vile lûte si brahtent .  
0,45 sô wirdet des lützel rât .  
0,46 swaz vlozen unde grât hât .  
0,47 an dem vinfden tage .  
0,48 sô wirdet ein mêre klage .  
0,49 sô hebet sich daz gevügele  
0,50 daz êr vlouc under himele .  
0,51 ûfen daz gevilde .  
0,52 iz sî zam oder wilde .  
0,53 si wuofent unde weinent .  
0,54 mit michelem geschreie .  
0,55 si bîzent unde krouwent .  
0,56 einander si houwent .  
0,57 des tages harte zergât .  
0,58 swaz vetach unde klâ hât .  
0,59 sô kumet vile rehte mit sêre .  
0,60 tac der sehste .  
0,61 der himel sich verwandelet .  
0,62 er wirdet tunkelrôt .  
0,63 an den mânen unde an dem sunnen .  
0,64 sihet man michel wunder .  
0,65 der tac wirdet also vorhtelich .  
0,66 in die erde bergen si sich .  
0,67 an dem sibenden tage .  
0,68 sô wirdet der luft al enwage .  
0,69 sô vihtet an daz drum .  
0,70 die winde an daz firmamentum .  
0,71 diu wazzer dâr widere .  
0,72 diu sint under dem himele .  
0,73 an dem mânen . unde an dem sunnen .  
0,74 sihet man michel wunder .  
0,75 sô hoeret man dicke .  
0,76 doner unde blicke .  
0,77 sô krimmet sich ze wâre .  
0,78 der arme süntære .  
0,79 deme sîn gewizzede daz saget .  
0,80 daz [er] gotes hulde niene habet .  
0,81 an dem ahtoden tage .  
0,82 sô wirdet diu erde elliu enwage .  
0,83 an der stunte .  
0,84 sô erweget sich von grunde .  
0,85 sô ne mac niuht des gestân .  
0,86 des ûf der erde sol gân .

0,87 sô trûret wîp unde man .  
0,88 si ne mac getroesten nieman .  
0,89 an dem niunden tage .  
0,90 alse ich vernomen habe .  
0,91 brestent die steine .  
0,92 daz geschihet vore dem urteile .  
0,93 si klîbent sich in vieriu .  
0,94 sô zeiget iz allez schiere .  
0,95 daz vûrhtet wîp unde man .  
0,96 unde swer iht verstên kan .  
0,97 an dem zehenden tage .  
0,98 vile lûtzel sulen wir daz klagen .  
0,99 sô zevallent die bûrge .  
0,100 die durch ruom geworht wurden .  
0,101 berge unde veste .  
0,102 daz muoz allez zebresten .  
0,103 sô ist got ze wâre  
0,104 ein rehter ebenære .  
0,105 an dem einliften tage .  
0,106 des sulen wir unsich wole gehalten .  
0,107 sô zergêt vile schiere  
0,108 dâ diu werlt mit ist gezieret .  
0,109 golt unde silber .  
0,110 unde ander manic wunder .  
0,111 nuschen unde bouge .  
0,112 daz gesmîde der vrouwen .  
0,113 goltvaz unde silbervaz .  
0,114 kelche unde kirchschatz .  
0,115 sô muoz daz allez zergên .  
0,116 daz von listen ist getân .  
0,117 nû wizzet daz iz wâr ist .  
0,118 iz zergêt unde wirdet ein valwische .  
0,119 an dem zweliften tage .  
0,120 sô hilfet uns daz vihe klagen .  
0,121 sô diu tier gênt ûz dem walde .  
0,122 daz vihe ûf dem velde .  
0,123 vile lûte si rêrent .  
0,124 sô si zesamene kêrent .  
0,125 mit lûteme geschreie .  
0,126 engegen dem urteile .  
0,127 an dem drîzêndem tage .  
0,128 sô ne mac sich nieman wole gehalten .  
0,129 sô tuont sich diu greber ûf .  
0,130 diu gebeine machent sich dâr ûz .  
0,131 alle gemeine .  
0,132 engegen dem urteile .  
0,133 iz ist allen den vorhtelich .  
0,134 die gewizzen sint der sünden ane sich .

0,135 an dem vierzehenden tage .  
0,136 sô wirdet diu bitterste klage .  
0,137 sô gênt diu liute alle ûz .  
0,138 ir ne bestêt necheinez in deme hûs .  
0,139 si wuofent unde weinent .  
0,140 mit lûteme geschreije .  
0,141 in dem selben dinge .  
0,142 sô zergênt ime die sinne .  
0,143 sô ne mac nieman gesagen .  
0,144 die nôt diu ist in den tagen .  
0,145 über swen got des verhenget .  
0,146 daz sich sîn leben dar gelenget .  
0,147 sô kumet der vinvzehende tac .  
0,148 sô nâhet uns der gotes slac .  
0,149 sô schulen alle [die] [ersterben]  
0,150 die dâr ie geboren wurden  
0,151 alle gemeine .  
0,152 vore dem urteile .  
0,153 sô heben sich vier winde .  
0,154 in allen den enden .  
0,155 ein viur sich entbrennet .  
0,156 daz dise werlt verendet .  
0,157 daz liuteret iz allez .  
0,158 sô brinnet stein unde holz .  
0,159 wazzer unde bûhele .  
0,160 die dâr sint under dem himele .  
0,161 sô kumet der jungeste tac .  
0,162 alsô schiere sô ein brâwenslac .  
0,163 sô komen von Christe .  
0,164 die vier êwangeliste .  
0,165 daz gebeine si quickent .  
0,166 die tôten si weckent .  
0,167 sô samenent sich mit êren .  
0,168 lîp unde sêle .  
0,169 daz ist vile wünniclich .  
0,170 die guoten sint dem sunnen gelîch .  
0,171 die engel vüerent schône .  
0,172 daz kriuze unde die korône .  
0,173 vore Christe an daz tegedinc .  
0,174 daz werdent sorgiclîchiu dinc .  
0,175 sô kumet Christus rîche .  
0,176 vile gewalticlîchen .  
0,177 der êr tougen in die werlt kom .  
0,178 dâ sihet in wîp unde man .  
0,179 im ist sîn schare vile breit .  
0,180 wande er die versmâchheit leit .  
0,181 von sînen vîanden .  
0,182 dâ wile er iz anden .

0,183 sô kumet [got] in den luften .  
0,184 in sîner magenkrefte .  
0,185 er rihtet dem hêrren .  
0,186 unde dem knehte .  
0,187 der vrouwen unde der diuwe .  
0,188 sô ist ze spâte diu riuwe .  
0,189 die wir haben solten .  
0,190 ob wir genesen wolten .  
0,191 sô werdent die vile harte geêret .  
0,192 die hier von der werelt kêrent .  
0,193 die sitzent dâ eneben gote .  
0,194 in der schare der zwelivboten .  
0,195 wande si durch gotes minne .  
0,196 verkuren wereltliche wünne .  
0,197 die sint alle geheiliget .  
0,198 die wirseren sint erteilet .  
0,199 sô wirdet der vile guot rât .  
0,200 die die werlt gezogenlichen hânt .  
0,201 die gotes nie vergâzen .  
0,202 dô si ze wirtschefte sâzen .  
0,203 doch wile ich iu sagen dâ bî .  
0,204 wie der leben sol getân sîn .  
0,205 si sulen got minnen .  
0,206 von allen ire sinnen .  
0,207 von allem ire herzen .  
0,208 von allen ire werken .  
0,209 si sulen wârheit pflegen .  
0,210 ire almuosen wole geben .  
0,211 mit mâzen ire gewant tragen .  
0,212 mit kiusche ire ê haben .  
0,213 beschirmen die weisen .  
0,214 die gefangenen loesen .  
0,215 si sulen den vîanden vergeben .  
0,216 gerihtes âne miete pflegen .  
0,217 den armen tuon genâde .  
0,218 die ellenden pfâhen .  
0,219 si sulen ze kirechen gerne gên .  
0,220 bîhte unde buoze bestên .  
0,221 swer niht vasten ne mege .  
0,222 der sol sîn almuosen geben .  
0,223 ne mege er des niht gewinnen .  
0,224 sînen besemen sol er bringen .  
0,225 dâ mit er sich reine .  
0,226 der ist allersæligeste . der sîne sünde weinet .  
0,227 swer daz mit triuwen begât .  
0,228 des wirdet dâ vile guot rât .  
0,229 ze dem sprichet der gotessun .  
0,230 “var ze mîner zeswen .

- 0,231 venite bendicti  
 0,232 mînes vater rîche ist iu gerihetet .”  
 0,233 daz geschihet an dem jungesten zorne .  
 0,234 dâ scheidet sich diu helwe . [von] [dem] [korne]  
 0,235 diu guoten ze [der] [zeswen]  
 0,237 [di] [übelen] [ze] der winsteren .  
 0,238 si werdent al gewindet .  
 0,239 an dem vrône tenne .  
 0,240 dâr [ane] denke swer sô welle .  
 0,241 sô sprichet got mit grimme .  
 0,242 ze sînen widerwinnen .  
 0,243 er zeiget in sîne wunden .  
 0,244 an den vuozen unde an den henden .  
 0,245 vile harte si bluotent .  
 0,246 si ne megen dâ niht widere gebieten .  
 0,247 von sîneme rehte sprichet in zuo .  
 0,248 “mînes willen ne woltet ir niht tuon .  
 0,249 ir hêtet mîn vergezzen .  
 0,250 ir ne gâbet mir trinken noch ezzen .  
 0,251 seledē noch gewæte .  
 0,252 übel wâren iuwere getæte .  
 0,253 dem tievele dienetet ir mit vlîze .  
 0,254 mit im habet diu êwigen wîze .”  
 0,255 dâ ist der tievel von helle .  
 0,256 mit manigeme sînem gesellen .  
 0,257 sô væhet er die armen .  
 0,258 vile lützel si im erbarment .  
 0,259 mit ketenen unde mit seilen .  
 0,260 er bindet si algemeine .  
 0,261 er vüeret si mit grimme .  
 0,262 ze anderen sînen gesinden .  
 0,263 in den tôt .  
 0,264 âne twâle lîdent si iemer nôt .  
 0,265 mit beche unde mit swebele .  
 0,266 dâ dwinget si vürder des tieveles übele .  
 0,267 dâ ne hilfet golt noch schatz .  
 0,268 êr bedæhten wir iz baz .  
 0,269 dâ ist viur unde swebel .  
 0,270 wir stürben gerne unde müezen leben .  
 0,271 durst unde hunger  
 0,272 aller slahte wunder .  
 0,273 vrost unde siechtuom .  
 0,274 gêt uns alle tage zuo .  
 0,275 viurîn gebende .  
 0,276 dwinget uns die hende .  
 0,277 machet uns die vuoze .  
 0,278 harte unsüeze .  
 0,279 mit viurvarwen seilen .

0,280 bindet man si beide .  
0,281 man schenket uns den wîn .  
0,282 des wir gerne übere möhten sîn .  
0,283 ezzich unde gallen .  
0,284 sam si viures wallen .  
0,285 ezzen heiziu si uns gebent .  
0,286 daz ist bech unde swebel .  
0,287 vile grôz wirdet unser smerze .  
0,288 die wûrme ezzent uns daz herze .  
0,289 daz ist uns gewizzenheit .  
0,290 diu tuot uns alsô michel leit .  
0,315 sô der tievel danne gevert .  
0,316 vile wole unser dinc vert .  
0,317 sô schînet uns schône .  
0,318 diu edele persône .  
0,319 sich zeigt got mit minnen .  
0,320 allen sînen kinden  
0,321 sô sint die arbeite vûre .  
0,322 sô singen wir zwire .  
0,323 alleluia daz vrô sanc .  
0,325 wir loben gotes êre .  
0,326 mit lîbe unde mit sêle .  
0,327 dô vâhet ane daz ist wâr .  
0,328 iubilaeus daz guote wûnejar .  
0,329 sô beginnen . [wir] [minnen]  
0,330 [di] [inneren] [sinne]  
0,331 vernunft unde ratio .  
0,332 diu edele meditatio .  
0,333 dâ mit erkennen wir Krist .  
0,334 daz er iz allez ist .  
0,335 sô haben wir vile michel wûne .  
0,336 sô sîn wir siben stunte . schoener danne der sunne .  
0,337 zuo der selben schoene .  
0,338 sô gibet uns got ze lône .  
0,339 eine vile stätige jugende .  
0,340 unde manige hêrlîche tugende .  
0,341 wir sulen starke werden .  
0,342 wolten wir di berge .  
0,343 zebrechen alse daz glas .  
0,344 ze wâre sage ich iu daz .  
0,345 die kraft habent dâ diu goteskind  
0,346 die hier mit vlîze . guot sint .  
0,347 dô haben wir daz êwige licht .  
0,348 necheines siechtuomes niht .  
0,349 dâ ist diu veste wineschaft .  
0,350 diu miltest trûtschaft .  
0,351 diu kûninchlich êre .  
0,352 die haben wir iermêr .

0,353 daz unsagelich lôn .  
0,355 habent die gotes erben .  
0,356 die dâ nâch wolten werben .  
0,357 entvliehen wir hier die sünde .  
0,358 wir sîn dâ sneller denne die winde .  
0,359 nû vernemet alle dâ bâ .  
0,360 dâ sît edele unde vrî .  
0,361 dâ ne ne dwinget iuch sünde noch leit .  
0,362 daz ist diu ganze vrîheit .  
0,363 dâ ergetzet uns got schiere .  
0,364 aller der sêre .  
0,365 die wir manige stunten .  
0,366 liten in ellende .  
0,367 dâ ist daz êwige leben .  
0,368 daz ist uns alzoges gegeben .  
0,369 Krist unser [hêrtuom]  
0,370 [unser] vernumft unde unser wîstuom .  
0,371 der ist gekêrt an in .  
0,372 vile edele ist unser sin .  
0,373 unser herze unde unseriu ougen .  
0,374 sehent die gotes tougene .  
0,375 vile girelich wirdet daz selbe lieht .  
0,376 iz ne wirdet zerganclich nieht .  
0,377 daz habent allez diu goteskind .  
0,378 diu hier diemüete sint .  
0,379 die ire schepfære lobent .  
0,380 unde hier ire vîanden vergebent .  
0,381 die versmâhent hier nidene .  
0,382 swie sô si dâ ze himele .  
0,383 mit gote geren ze habene .  
0,384 dâ ist vile guot ze lebenne .  
0,385 dâ wirdet ire geloube ein wârheit .  
0,386 ire gedinge mit habenne ein sicherheit .  
0,388 si sint den engelen gelîch .  
0,389 daz habent si âne ende .  
0,390 nû weset vile wole gesunde .  
0,391 in der selben râwe .  
0,392 dar müezet . ir komen . âmen .  
0,393 ditze buoch tihtete .  
0,394 zweier kinde muoter .  
0,395 diu sageten ir disen sin .  
0,396 michel mandunge was under in .  
0,397 der muoter wâren diu kint liep .  
0,398 der eine von der werlt schiet .  
0,399 nû bitte ich iuch gemeine .  
0,400 michel unde kleine .  
0,401 swer dize buoch lese .  
0,402 daz er sîner sêle genâden wünschente wese .



0,403 umbe den einen der noch lebet .  
0,404 unde er in den arbeiten strebet .  
0,405 dem wünschet genâden .  
0,406 und der muoter daz ist Ava .